



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim tiryimyim@aolima tir yimyim TAPAK 3

Zelenskyy-i EU lenirtem dang fighter jets meshi

Nüburtemi Banks aser LIC nung sen deposit asütsü tsübur: Mamata



VOL. XX NO. 119 (ADOK 119) DIMAPUR ROGONÜ (FRIDAY)

TSÜKLAI (FEBRUARY) 10, 2023

₹ 5.00

February 27 nü NLA elections atema candidate 196 anünga lir

Kohima, Tsüklai/February 09 (TYO): February 27 nü Nagaland Legislative Assembly elections agütsü aliba nung tokteptsü atema Nagaland chief minister aser tetsür pezü densema candidate 196 anünga lir.

Bodhbarnü nominee 225 indang documents tem asadanga sülen paper 22 'invalid' aliba ngutet aser candidate tenet-i agüja aliba nomination agien, ta Nagaland Chief Election Officer indang office ajanga Brehostibarnü agütsüba list nung shia lir.

Bodhbarnü candidate aseme 'withdraw' asü aser Brehostibarnü candidate pezü agien.

Taküim Nagaland Legislative Assembly indang General Election

nung political party 13 nung tokteper aser yangji Nationalist Democratic Progressive Party (NDPP), Bharatiya Janata Party (BJP), Naga People's Front (NPF), Congress, Lok Janshakti Party (Ram Vilas), National People's Party (NPP), Janata Dal (United), Republican Party of India (Athawale), Nationalist Congress Party, Rising People's Party, Rashtriya Janata Dal aser CPI nungi candidate tem shima lir.

Kasa mapang independent candidate 20 dak tema lir.

Candidate withdrawal atema February 10, 2023 ya anogo tatembang asütsü, election ya February 27 nü alitsü aser March 2 nü vote azüngtsü.

CM-i Kruse aser Yhome na atema election nüboyim tenzüksüogo

Kohima, February 09 (TYO): Brihostibarnü Nagaland Chief Minister, Neiphiu Rio-i NDPP candidate ana- Salhoutuonuo Kruse (Western Angami A/C) aser Dr Kekhrielhoulie Yhome (Northern Angami-I) na atema election nüboyim tenzüksüogo.

Sentong anaprongla nungji jembidang Rio-i, terenlok tsütsü state tesülen ajemzüka lir, iba ya Naga yimtenren ken o melatetba aser state nung resources ajema aliba agi lir, ta ashi.

Paisa, NSCN-IM aser Working Committee of NNPGs-i Naga yimten ken o latettsü atema India sorkar den

jembidar aser Framework Agreement-a agiogo saka telok balala tsüngda aser tribal organization balala tsüngda telongjem maliba agi yimten ken o tembanga melatet, ta ashi.

Paisa, tang Naga yimtenren ken o atema tejembidak mapang nung India sorkari state assembly nung menden tali 20 agütsütsü aser Lok Sabha menden ana agütsüsemstü nangzükogo; ibaji ajanga Eastern Nagaland, Central Nagaland aser Tenyimi area shia Parliament nung menden kaka atatsü aser Rajya Sabha nunga menden ana angütsü, ta metetdaksü.

Rio-i, February 27 nü election agiba sülen NDPP-BJP teloktepi ano maneni sorkar akümsü, ta metetdaksüba den külemi pai voters dang, 14buba Nagaland assembly nung tongtubang telemetba agütsü aika lir, anungji sorkar tashi itshtitsü atema par candidates yariang, ta mepishi.

Salhoutounuo Kruse atema nüboyim sentong Khonoma Community Hall, Khonoma village nung tenzük aser Kekhrielhoulie Yhome atema nüboyim sentong Ziekezou, Kohima village nung tenzüka liasü.

Tang tashinung sen crore 31 dak tema pua lir

Dimapur, Tsüklai/February 09 (TYO): Chief Electoral Officer, Nagaland indang office ajanga sangdong ka nung ashiba agi, state nung election agütsü sangdongba anogo nungi February 8, 2023 nü tashinung Central aser State nungi Enforcement Agencies temi sen 31,57,89,902 (Thirty one crore fifty seven lakh eighty nine thousand nine hundred and two) jenjang yi, mozü, sen aser danga

osettem pua lir. Oset balala apuba tejangja yamai alitsü:

- (1) Cash= Rs. 1,64,62,850
- (2) IMLF (40925.65 Litres)= Rs. 4,73,50,281
- (3) Drugs/Narcotics (3.06 Kgs)= Rs. 23,33,61,339
- (4) Freebies/other items= Rs. 1,86,15,432

February 8, 2023 nü sen 3,19,000, sen 2,05,932 jenjang yir litre 576.09 aser drugs/narcotics sen 92,985 jenjang apu.

Nagaland nung Angetyongpang A/C ya tongtibang: Tongpang Ozukum

Mokokchung, February 09 (TYO): 24th Angetyongpang A/C nung NDPP candidate, Tongpang Ozukum-i February 9 nü election nüboyim tenzükogo; declaration mezüing anogo nung pa den NDPP party nung inyakterem, Mokokchung District BJP ketdangpurtem aser temeimertemi Longkong aser Chakpa yim na semdanga liasü.

Longkong yimdak nüburtem den jembidang Tongpang Ozukum-i taoba election nung pa dak melung lemteta pa yariba atema pelaba lemsatet.

Nagaland political map nung 24th Angetyongpang A/C ya tongtibang ta metetdaksütsü mapang tongogo, ta shia pai nüburtem dang asen constituency aser Nagaland

atema nükjidong ano tuluba atemzuka inyaktettsü atema maneni pa yaritsü mepishia metetdaksü.

Chakpa yimdak nunga Tongpang Ozukum-i nüburtem dang, tesüiba küm 3 nung pai inyakba mapatem ajanga masadangtsüla, kechiyong wara mapang nung küm anabo süidaksüogo, ta metetdaksü.

Paisa nüburtem dang pai nangzükbatem ataloktsütsü atema maneni pa yariang, ta mepishi.

Kasa sentong nung NDPP ketdangpurtem, Mokokchung region, BJP Mokokchung District, Vice President central women organisation NDPP Nagaland, Phagsang Area Telongjem President Nangshi,

Chakpa Village Council züngsemtem aser tangartemia o tatsütsü jembia liasü.

Tepela o jembidang Village Council Chairman, Longkong Medemsanger Putu Menden, Moyalepten-i, declaration sentong ya melung masüba onüktem candidate dang indangindanga ashitsü maongka tajung, ajisüaka taoba kümsük nung Tongpang Ozukum-i yimertemi aginüba ama inyakogo, anungji minister dang melung masüba o ashitsüsa kecha mali, ta metetdaksü.

Kasa sentong nungji NDPP, Mokokchung region President, N Bendang Jamir, Vice President, BJP, Mokokchung District, P Lanutoshi nungeria o tatsütsü jembia liasü

Temelaba mali social media nung political party ken meinoktsü metetdaksür

Dimapur, Tsüklai/February 09 (TYO): Chief Electoral Officer, Nagaland indang office ajanga Recognized Political Party & Registered Unrecognised Political Party ajunga indang tirtem dang sangdong ka nung ashiba agi, Pre-Certification makai YouTube/Social Media nung political party indang ken upload masütsü metetdaksü.

anema lir, ta ashi.

Anungji electronic media nung advertisement ajak temai madokdang committee nungi pre-certification meshitsüla, ta sangdong ajanga ashi.

Iba dak sendakba nung political party shirnokisa pre-certification makai theme songs, campaign songs ama advertisement upload süa ali, itemji tangsa agentsüla aser certification atema committee nem agütsütsüla, ta Chairman Pre-certification Committee & Additional Chief Electoral Officer, Ruokuovituo Khezhe ajanga ashi.

Political party kari jelia temelaba memeshi electronic media nung advertisement inoktsür, koba Supreme Court ajanga Apri 13, 2004 totuyuba aser Election Commission totuyuba

Solo/Chiu yimtsüng nung February 3 nü ki 73 menakrepa rongtok



February 3 nü Solo/Chiu yimtsüng kirong lendong atalokba tesem aser MTBA-i teyari bendena bener yokdang tangokba noksa angur.

Mokokchung, Tsüklai/February 9(TYO): Myanmar nung Naga nungeri yimsü asüba tesem nung aliba Lahe town nung aliba Solo/Chiu yimtsüng nung February 3 nü kirong lendong tuluka atalok.

Osang ajanga angashiba agi ki ajak agi 73 tashi menakrepa rongtok aser iba lendongji ajanga

nisung 700 shi talidak makai kanga dang okrongtepdagi. Iba kirong lendong nung tasüba aser yiruba kecha maliasü.

Iba kirong lendong osang angashir kelen Mokokchung Town Baptist Arogo (MTBA)-i achayanga temelungertem nungi mozü,aben süoshi, portable solar lights aser

rongsen teyari aika dang bendena bener yokogo.

Ano maneni shirnokisa teyari balala aguja yaritepner parnoki MTBA office nung mesüra tenzüker nem agütsütsü aser Fellowship-tem nung agütsütsü asoshi MTBA sangdong ka metetdaksü.

Ao Baptist Arogo Mungdang (ABAM)
 IMPUR-798 615, MOKOKCHUNG, NAGALAND: INDIA
 E-mail: abamimpur7@yahoo.co.in
 Website: www.abamimpur.org
 ☎ : 0369-2262202 (O)

METETDAKTSÜR

February 14, 2023, nung Ao Baptist Arogo Mungdang (ABAM) ajanga aruya aliba 14th Nagaland Legislative Assembly Election nung Aor shirnoksa Contest asütsü ali, nenok ajak den ABAM-i sensaksem aser sarasadem sentong ayonger. Anungji Kandidatetem ajak February 14, 2023, 1:00 PM nung ABAM Office, Impur, tonga arutsü mepishir. Candidate ajak dangi anogo ishika tsüngda shiti yoktsü. Iba sentong ya tongtipang ta angateta medema arutsü metetdakja atar.

Sd/-
 Rev. Temshi Longkümer
 President, ABAM

Mar Pongener
 Rev. Dr. Mar Pongener
 Executive Secretary, ABAM.

" Lenir kaji shibai lenmang metet, shibai iba nung jajar aser shibai lenmang sayutetter " John C Maxwell

- Ungma Baptist Arogo Laishir Telongjem Clean Election Tayongzükba

Mkg nung Election Observers aser district ktdangsür senden amen



Mokokchung district atema Election Observer temi district nung ktdangsürtem den senden ka Deputy Commissioner, Mokokchung indang Conference Hall nung February 9, 2023 nü mena liasü.

Dimapur, Tsüklai/February 09 (TYO): Election Commission of India nungi Mokokchung district asoshi Election Observers Prashant Kumar Panda IAS, Alka Srivastava IAS aser Kamal Saroch IAS nungertemi aruya aliba state general election atema renemshia aliba maparen asadangtsü asoshi District Administrative Officers, Election

Department ktdangsür, ROs, AROs, aser Police ktdangsür tem den senden ka February 9, 2023 nü Deputy Commissioner, Mokokchung indang Conference Hall nung mena liasü. Iba senden nung Deputy Commissioner & District Election Officer, Mokokchung, Shashank Prarap Singh IAS ajanga district nung election junga agitsü atema machinery

aser osettsüset amenoka aliba indang tongmelang agi rateta ashi aser SP Mokokchung, Manoj Kumar IPS ajanga district nung election atema security tsütsü renemshia aliba indang osang agüja liasü. Election Observer temia parnoki ajitetba kar lemsatep aser nungdakba mera agitsü atema tangatetba lemsatepa liasü.

Shiong Baptist Arogo nem Assam Rifles temi menden agütsü

Dimapur, Tsüklai/February 09 (TYO): HQ IGAR (North) kübok aliba Assam Rifles, Mokokchung Battalion ajanga February 9, 2023 nü Operation Sadbhavana Project 2022-23 tenüing nung Mon district nung aliba Shiong Village Baptist Church nem plastic chair 50 agütsü. Iba mapa ya Operation Sadbhavana Project 2022-23

kübok Shiong yimtsüing nung aliba Sannüker, Gaon Bura, Village Chairman aser yimdaklir ajak densema alidang agütsüogo. Tamangba yimsü dak sendakba sentongtem ayongzüka agidang timtem ajuruba arogo yaritsü nükjidong nung iba sentong ya ayongzüka liasü. Iba sentong nung Company Commander ajanga tarutsü

mapangtem nung kaket shisatsü bushiba aser lanurtem tashi itshidaktsüba nung inyaktsü bilema aliba maparentem lemsatepa liasü aser item teyari nüburtemi takok tashi agitsü ajungshia liasü. Sepaitem ajanga nübur khuret aser tebilemsü ajiteta iba ama mapa tajung inyakba asoshi yimdaklir temia pelaba lemsatepa liasü.

Dimapur-II nung MLA aser NDPP candidate Moatoshi Longkumer nübuyim tenzükogo



Dimapur-II nung MLA aser NDPP candidate Moatoshi Longkumer nübuyim tenzükba sentong nung jembiba noksa nung angur.

Dimapur, Tsüklai/February 09 (TYO): Lanur nem tashi agütsütsü asoshi rangloker jembidang, Dimapur-II Assembly Constituency nung tang temendak MLA aser NDPP candidate Moatoshi Longkumer-i ashiba agi, tayongba nung business inyaktsü, resources temelaba nung ngutettsü aser ochishia inyakba entrepreneurs putu tasen ka yanglutsü nükla lir. Brehostibarnü Lengrijan Ground nung pa election nübuyim tenzükba sentong nung jembidang, Dimapur nung aser talisa Dimapur-II nung self employment aser lanur jenjang ajungketba nung rangloksü kü nokla lir, ta Moatoshi-i ashi. 2022 küm January ita indang data ajanga ashiba agi Nagaland nung zünger mapa mongui aliba

lanur 92,302 lir, koba nütsüing yongsük telemsa den medemdangra India nung timtiba alitsü, ta pai ashi. Yamaji zünger mapa mangur taoksatsüka akumdak lanurtem tezü atangba tenzüktsü, ta ashi. Sorkar mapa agi matar asünung, pei sasa pei nem mapa agüja inyaktettsüji kanga tongtipang. Iba dak sendakba nung jembiba mapang, lanurtem nem IT sector, hospitality, manufacturing, agriculture aser soft skills amala nung skill training agütsütsü, ta paisa ashi. Dimapur lima Clean City kümdaktsütsü nükjidong nung süngdong atemba, jana recycle asüba, urban gardening, tzü rizünga ayuba aser ibala mesükba libajen den putepba maparen inyaktsü asalentong lir, ta shisem.

Dimapur-II nung tenüngdaktiba tesem tem repranga kiyong lenmang tem aser kilentzü aoba tesemtem yanglutsü nükla lir, ta pai ashi. Temesepba mozü achiba aser ayokba amala maparen den raratsü asoshi, kiyong shia terepranger telok tenzüktsü aser yamala chiyongtsü achirtem asoshi rehabilitation centres tem lapoktsü, ta Moatoshi Longkumer-i ashi. Dimapur-II nung aliba nütsüing ishiba aliba telok tem asoshi parnok temeten kümzüka yutsütsü, nisung taintem anepalutsü, lajar aser amitsür anepalutsü asoshi alakteta inyaktsü, ta pai shia liasü. Iba sentong nung Lengrijan village council, NDPP mendenpur aser CEB züngsem tem nungia o jembia liasü.

NSCN/GPRN ajanga Hega benjong salem lemsatep

Dimapur, Tsüklai/February 09 (TYO): NSCN/GPRN ajanga Zeliangrong Naga nung dangi Hega benjong salem abener, koba February 10-15 tsüngta amunger, ta NSCN/GPRN (Akato Chophi) indang sangdong ka ajanga ashi. Ibai kiyimba benjong ka lir

aser tanükba, temoatsü aser teyari atema Tulusang nem bendanga agütsür. Iba benjong ajanga Tulusang Tsüngremi aser Zeliang nung adianu aser adianutsür nem temoatsü aser teyari agüjang ta moatsür, ta sangdong ajanga ashi.

Expenditure Observer temi 8 Western Angami A/C semdang



Dimapur, Tsüklai/February 09 (TYO): 8 Western Angami Assembly Constituency atema Expenditure Observer Shyam Kumar-i Election Expenditure Monitoring system mapa kuma inyakba asadangtsü atema

February 9, 2023 nü Constituency semdanga liasü. Expenditure Observer ya meina 8 Western Angami Assembly Constituency indang Returning Officer, Tiayanger Jamir arua liasü.

Ak nem vaccine agütsütsü ajungshir

Dimapur, Tsüklai/February 09 (TYO): Animal Husbandry & Veterinary Services Directorate ajanga state nung ak metsürtem dang sangdong ka nung meyi metenzükdang Classical Swine Fever-Control Programme kübok Classical Swine Fever (CSF) anema pei ak nem anasatiba Veterinary Institute nung vaccine agütsütsü metetdaksü. Maneni Chief Veterinary Officers ajak dang Directorate

Office nungi office mapang 2022-23 atema vaccine meshitsü metetdaksü. Government of India ajanga CSF-CP kübok state ajunga nung noklang nung noklang shilem CSF vaccine agütsütsü tuyua lir aser district ajunga nung temsüa aliba ak ajak nem tepensa makai vaccine agütsütsüla aser vaccine agir aliba ak ajak 'ear tag' asütsüla, ta kasa sangdong ajanga ashi.

KBBB ajanga Mon nung Clean Election Movement ayongzük



Dimapur, Tsüklai/February 09 (TYO): KBBB ajanga Mission Centre Mon nung "Let your Vote define a Better Tomorrow" omen kübok Clean Election Movement sentong ka February 9, 2023 nü ayongzüka liasü. Clean Election Movement Mon Convener, Nyamto ajanga iba sentong nung ashiba agi, Clean Election indang awareness ajungkettsü mechi Assembly Constituency shia Clean Election Movement Sub-Committee Convener/Co-Convener aser Secretary shim. Executive Secretary KBBB Chemyuh ajanga züngsem dang Clean Election indang nükjidong aser

teinyaktsütem zünga metetdaksü. KBBB ajanga Mon district nung iba movement tenzükba atema Deputy Commissioner & District Election Officer Mon, Ajit Kumar Verma ajanga pelaba lemsatepa liasü. Iba mapa ya tezüba masü, saka tarutsü jenjang tajungba kumdaktsütsü asoshi inyaktsüla, ta pai ashi. Pai tensa tajung nung asüngteta, ochi nung election shidak agitsü ajungshia liasü. Superintendent of Police Mon ajanga iba election tajungtiba nung agitettsü asoshi Police aser security personnel den amalitep akatsü ajungshia liasü.



February 09, 2023 nü Jammu yimti tezülen Nagrota nung Jammu & Kashmir Apni Party senden nung party Tir, Altaf Bukhari-i jembidang tangokba noksa nung angur.

Congress ajanga linüki küm 60 tashi takoksa angu: PM Modi

New Delhi, Tsüklai/February 09 (Agencies):

Brihostibarnü Ato kilonser, Narendra Modi-i Congress party maneni aija, Congress ajanga linük terenlok kanga mezülongi kümdaktsü aser küm 60 tashi takoksa angu, ta aitsü.

Bodhbarnü Ato kilonseri Lok Sabha senden nung Congress aija jembiba sülen Brihostibarnü Rajya Sabha nunga pai maneni Congress aitsü.

Rajya Sabha senden nung opposition party temi Adani group ochimashi ken o bushisüngdangtsü atema Joint Parliamentary Committee (JPC) nem agütsütsüla, ta takhangba agüja yimyim tayimdak mapang nung Modi-i jembia liasü.

Modi-i, "Congress-i kodanga India nunger tebilemtsü bentettsü atema memerangdangi liasü. Linük onok den lir, nüburtemi Congress party sendokogo aser mapang shia parnok nem temerenshi agütsür," ta metetdaktsü.

Opposition-i maneni longkak aita ayimdenyonga Modi-i tesüiba küm 9 tsüingda BJP-i aniba NDA sorkari inyakba terenlok mapa balala metetdaktsü.

Opposition-i "Modi-Adani bhai bhai" ta ayimdenba mapang nung Modi-i parnok aija, opposition-i inyakba

mapatem ajanga BJP taliba azükarur, ta ashi.

"Nenoki kodaka anak paloktsüyonga lotus naro tuluba dang apongtsü," ta pai ashi.

"Opposition-i science aser technology anemer; parnoki linük atema mebilemer saka parnok politics atema dang bilemer," ta pai ashi.

"Coronavirus wara mapang nung linük nung vaccine yanglur India nunger scientist tem tenüng menüksütsü atema parnoki meranger," ta pai opposition aitsü.

"Congress party indang rongsenketzüng, loktiliba aser yimtenren mapatongtemji vote angutsü atema dang liasü," ta pai ashi.

"Congress-i scheme balala Nehru-Gandhi kibong tenüng nung jaloktsü saka ozü sorkaribo India nung takutet lenirtem nüngtem nung schemes nüngja agütsür," ta pai ashi.

"Congress-i opposition nung regional lenirtem atema timtem adokdaktsü. Centre nung Congress sorkari linük temzüng nung Arrla 356 tim mesüi amshia state sorkar 90 ben thinentsüogo," ta paisa metetdaktsü.

Congress Tir, Mallikarjun Kharge aija Modi-i, "Kharge-i, ni aiben Kalaburagi semdangert ta aitsür. Pai yangji inyakba mapatemji reprangdangtsüla,

kechiyong Karnataka nung Jan Dhan bank account crore 1.70 lapokogo aser iba nungji Kalaburagi kija nung lakh 8 dak tema bank accounts lapokba densema lir," ta ashi.

"Mallikarjun Kharge-i, tesüiba küm 60 nung Congress-i linük tamendakdak tashi itta yanglu, ta jembir. 2014 küm ni osang tejangja bushiba mapang nung ni yamai bushiteta liasüküm 60 nung Congress kibongi lenmang nung ongken dang yanglu," ta pai metetdaktsü.

"Congress ya Panchayat level nungi Parliament tashi nung tashi liasü, saka parnoki tebilemtsü balala teti atema bentettsü atema mebilemdang mesüira memerangdang," ta pai ashi.

Modi-i, tesüiba küm ishika tsüingda 'Jan Dhan Aadhar Mobile' trinity amshia nüburtem nem DBT ajanga sen 27 lakh crore agütsüogo, ta metetdaktsü.

"Ozü sorkari tesüiba küm 3-4 tsüingda kibong crore 11 nem tzü supply agütsüogo; 2014 küm jaldangbo kibong crore 3 nem dang agüja liasü," ta pai metetdaktsü.

"2014 küm tashi nungbo nütsüng shilem tesang dang teimba ket nung banking facilities maliasü saka tesüiba küm 9 kija nung bank accounts crore 48 lapokogo," ta pai metetdaktsü.

2011 küm nungi tenzüka nisung lakh 16-i India senso toktsüogo

New Delhi, February 09

(Agencies): Yaküm India nunger 2,25,620-i linük senso toktsüba densema 2011 küm nungi tenzüka tang tashi nung India nunger lakh 16 dak temai India senso toktsüogo, ta Brihostibarnü Rajya Sabha nung sorkari metetdaktsü.

Tasüingdangba ka langzüdang External Affairs Minister, S Jaishankar-i, 2015 küm India nunger 1,31,489-i senso toktsü, 2016 küm India nunger 1,41,603-i senso toktsü aser 2017 küm India nunger 1,33,049-i senso toktsü, ta metetdaktsü.

Paisa, 2018 küm India nunger 1,34,561-i senso toktsü, 2019 küm 1,44,017-i senso toktsü, 2020 küm 85,256-i senso toktsü aser 2021 küm India nunger 1,63,370-i senso toktsü, ta metetdaktsü.

2022 küm nunga India nunger 2,25,620-i senso toktsü.

Jaishankar-isa 2011 nung India nunger 1,22,819-i senso toktsü, 2012 küm nisung 1,20,923-i senso toktsü, 2013 küm nisung 1,31,405-i senso toktsü aser 2014 küm nisung 1,29,328-i linük senso toktsü, ta metetdaktsü.

Anungji 2011 küm nungi tenzüka tang tashi nung linük senso toktsür India nunger ajak senteper nisung 16,63,440 asütsü, ta paisa metetdaktsü.

Ano tanga tasüingdangba ka langzüdang pai, tesüiba küm asem tsüingda India nunger nisung pongui United Arab Emirates (UAE) senso nguogo, ta ashi.

Jaishankar-isa India nungeri tanga linük senso agiba linük 135 metetdaktsü.



Turkey kübok Hatay province nung Indian Army temi menoknok lendong nung yirurtem yaritsü atema field hospital amenokba noksa nung angur.

Nüburtemi Banks aser LIC nung sen deposit asütsü tsübur: Mamata

New Delhi, Tsüklai/February 09 (Agencies):

Brihostibarnü West Bengal Chief Minister, Mamata Banerjee-i, nisungtemi banks, post offices aser LIC nung sen deposit asüba atema shisabulua bilemtsür, ta metetdaktsü.

Tawa Hindenburg Research report ka ajanga Adani Group-i ochimashi inyakba tai tongloktsüba ajanga SBI aser Life Insurance Corporation takoksa angutsüsa lir, aser iba dak sendakba nung Mamata Banerjee-i, "Künü anogo nungbo parnoki LIC, banks aser post offices anentsü atema ashitsü; süra nüburtem kongi aotsü?" ta ashi.

Panchla nung project balala atema foundation lung azüngtsüba sentong nung jembidang lai, nüburtemi life insurance nung sen invest asür, aser bank nung sen rizünger, ta ashi.

Laisa, Centre sorkari West Bengal nung MGNREGS scheme kübok anogo 100 mapa inyakba atema sen melemzüktsü, ta metetdaktsü.

"Onoki tang tashi Mahatma Gandhi National Rural Employment Guarantee

Scheme (MGNREGS) atema sen crore 7,000 mangur," ta lai ashi.

Taoba mapangtem nung senotsü junga mamshiba nung ajemdaker Centre nung BJP-i aniba NDA sorkari West Bengal nung welfare schemes balala atema sen melemzüktsü lir.

Mamata Banerjee-i, "Ni central sorkar dang sensakertem tim-tetemdaktsü aser tagütsütsü aliba sen agüjang ta shiogo," ta metetdaktsü.

Laisa, state sorkari mapa inyakba anogo taa lakh 10 atema state senpong nungi sen agütsüogo aser Prime Minister Awas Yojana scheme kübok ki lakh 11 atema-a Centre-i state nem sen tagütsütsü lir, ta metetdaktsü.

Trinamool Congress tongti, Mamata-i, iba scheme atema state sorkari senotsü shilem 40 agütsür, ajisüaka iba scheme atema tenüng tajung ajakji Centre sorkari agir, ta ashi.

"Iba ya asen sen, kechiyong parnoki (Centre) GST saru agir saka parnoki asen shilembo magütsür," ta laisa metetdaktsü.



February 09, 2023 nü New Delhi nung Parliament kima AAP aser BRS MP temi Adani Group ochimashi ken o bushisüngdangtsü atema Joint parliamentary committee (JPC) nem agüjang, ta takhangba agüja longkak aitba noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, TSÜKLAI(FEBRUARY) 10, 2022

Tangar lendong, asenok tangazüksü !

Tan Tentonü February 6 anepdang züngia lia, Turkey aser Syria lima nung menoknok tulu anokba lendong nung nisung meyirijang terana shi asüba osangji taoksatsüka, tetsübutzüka aser temulung ashitsüka lir. Tang ya Turkey aser Syria lima ya kanga temekong mapang lir aser tsünglua arur, anungji menoknok lendong nungi kümzükertema tasük aser temekong agi kanga timtem tia nung lir. Atangji, yimtitem nung atongtepa asüba ki tulu aser talang süngdong tulu aika külemi laor ama lao chirepba agi yimti lenmangtema kanga mesademi küma lir aser item kiojen chirepbatem jagi nisungtem kwikashibo nembanga alitsüar shingaila meshitetter. Tang tashi nung nisung meyirijang terka dak tali tasü mang agitetogo aser mesüi taküm alirtema aika yirur mozü kidang anepaludagi aser anema alirtem government kiojen aser Muslim nunger tenla ki balala nung jenokdakja lir. Turkey aser Syria limatem ya Muslim nunger limatem lir aser parnok yimsü agi nisung sür ali nung marem talangka mayur. Ajisüaka, kibong aika kinunger ajak külemi menoknok lendong nung ya remoka sür mang bushir mali nungji, tasü mang aika shiba mangar mejangjateti yua lir. Item mangji anogo pongo tsüngda tebushir melira DNA tendangtsü aser temeyong nemdakja (finger print) noksa agia yur aremtsü. Tang tashi nung alima kin metsü dak tali nungi teyaritepertem den teyari tapu balala yoka yaritepdagi. Syria nungbo ki chirepa aliba telong nung tekümzükertemi ali aser long yatetba garitem amshia tanem-tanemi yapoka aludang kinü tetsür chanu ka tetsü tebok nungi sozükli ano tepela züa mepetdang ser tetsü tasü mang den külemi lia kaktet aser Turkey nunga tsürabur kinungertembo ajak sür küm asem tain tebur chanu ka taküm lia kümzük. Item ama tatalokba otsü anogo shia Turkey aser Syria lima menoknok anokba tesemtem nung atalokdagi. Iba menoknok lendong nung asür mang aser mesüi taküm alir bushirtem mapaji kanga tasak, kechiyong mekongba agi tetsüng tebena junga marakzüteter aser ki ka madak ka ta chirepa alibatemi kanga tanemtanemi kakpoka aluba agi mapanga kanga agir. Aji oda, kitemji kakpokyonga aluba mapang tasü mang agitetdang jeptepli aser taküm agitetdang pelatepli ta nisungtem pongmang nunga mesük aser asangsanga mesük ta shisabolu timtem tia nung lir. Atangji, Turkey aser Syria lima nung menoknok lendong ajuruba ya tang mezü ng masü saka akhi tejen putu mapang nungi mapang mapang shia menoknok lendong tulu ajuruba otsü lir. Ajisüaka, nisungtemi tan masür aser menoknok anokyonga kiojen chirepa lendong mataloktsüsa government-ia kiojen yangluba mapatem junga merepranger. Iba jagi menoknok anokba agi masü saka menoknok anokdang kiojen chirepba agi nisungtem taküm samar. Ashi, tang ama menoknok anokba yabo ali tema agi telong küma anokba masü mesüra ali tekong agi tzüim kümdakja anokba lendonga masü, anungji telidak purtemi menoknok sashia anokyonga kiojen melaotsüsa yanglua alinungbo, tang ama menoknok lendong aruyonga tasütama lendong patetkajibo majurula. Alima nung menoknok anokba tesemtem rongnung India nunga asenok aliba Northeast state-tem ya amshia lir. Iba jagi , tanga lima nung ama sashia manokaka, mapang mapang shia menoknok anokba asenoki metetter. Iba amaji anokanoka, ashiko, mapang kabo tang Turkey aser Syria nung anokba amaji asen lima nunga menoknok kanga sashia anoktsüa akok. Iba amajika anokra, asen limabo Turkey aser Syria yimtitem dang nung jagi tamajungba raksaa auyi akümtsü südi ta shisabolua bilemer. Asenok ama menoknok anoktsüsa aliba tesemtem nung ya, shitakba agibo, takar asüyonga akaba yari azüklen kiojen talangka yanglua metudaktsür. Aji oda, akayonga azüklen anaben atongtepa atuba ki dak alaka azüklen takdang talila amentepa metudaktsür, kechiyong menoknok anokdangbo item kitemji nisungtem asoshi leper akümer. Ibaji kodang bilemdangdir, asenoki yangluba ki tadongtep talang aika technical kecha mamshi aser osettsüsettema tajung masü mashi tejentera dena bushia yangluba kitem lir. Memenudang itemji repringshitsüla aser asenok state nung kiojen yangluba ozü ng ya jungjunga lateta amshi tenzükra, iba jagi memeteti tangar nisung dang masü asen kinunger taküm dena aika kümzüksü.

OLEMSABANG

AO KIN TEMENEN BUSHIA TEMULUNG MEMEYIPRA AIATAI TIAI AITSÜ

~ L.Kika Pongener.

Ao kin-i temenen nangzüka temulung meyipa Tsüngrem mebushira kopi melii aiatai tia kati aitsü kecha menua mali. Naga lima nung mezü ng Khristan yimsu agizükba kin tang kechi jenjang nung lir (?)...ta khen arokaroka shisadangtsü mapang ka tongogo. Tsüngrem o-i ashir, "Aia nisung sunga aliba yimti-to koda rongjenseta mena lir, kin rongnung la tulu aliba-to koda amitsür ama küma lir, yimti rongnung chubatsür ka aliba-to koda tayimer ka küma lir" (Aiatai-1:1). Yerimia ainkar-i Israel kin tia ngur mangyima ajepbaji, tanü asen Ao kin asoshi ajepba memesuk no...??? Tsüngremi Israel kin tangar ajak tang nungi balaka shimtet, ajisuaka Israel kini Tsüngrem sendok aser sungyanglutem dangi meyip. Ijip lima nung alar tia nung lia, par tetsü-tebou Abraham, Isak aser Yakob dang nangzükba 'Tenangzükba lima' mamatzü aser ninang-mochitzü yima aliba lima, parnok nem tanaben meyipa agütsü. Ajisuaka, Israel kini Tsüngrem jashitsüsa temenen tulu inyak. Anungji Israel kin anema Tsüngrem kanga ain adok, Yirusalem yimti alima kin ajaki akümketa repranga aliba-to tsükchiri aoyi küma tepsaa rongdoktsü, aser aiur asangur ajak Babyloni alar asutsü pur ao, ajiser, atura nubu tajung tashikar aika tepset. Tsüngremi Israel kin shimtetba ama asen Ao kin Naga nunger kin ajunga tang nungi balaka alakteta shimtet. Ajisuaka, tanübo asen Aotsür Aor lenla ajak nung tangar küpok alitsüsa tensa mapang ka bentsür arua lir. Aji oda, Israel nunger ama alar tia nungsa meliaka tanü asen Ao kin lenla ajak nung tangar küpok lidagi. Küm ishika sua-ogo, asen Aotsür Aor aiur-asangur nubu tajung, tobur tajung, sempet tajung aketer, kibong tajung chirtem, langpang sunga nangdaka yur chiyunga-jema alirtem, mozü (Drug) achiba agi tapayutsüka karbo teret-a mongui taküm samaogo. Tanüa kibong tajung nung soa inteter aiur-asangur aika jana-ruja nangden dak tesem nung, aser lenmang tezülen kilentsü (Nalla) nung mozü agi letseter, yi agi meseper ontaktepa mejanga alibaa mapang kar nungbo ajurur. Aiur asangur tobur tajung, nubu tajung, sempet tajung aketer aika mozü-lar aser yi-lar kümer Rehab centre nung yua kar. Ano aiur aso-ajen tajung, tobur tajung aika sen yong pei temang shi yoka nemzüdagi. Ano aiur asangur nubu tajung aika HIV & AIDS tashidak keter tsürabur aser adianui sendoker kima yimdong nung kibur maliba azü (Street Dog) ama nemzür aika lir. Tsüngrem o-i ashir, "Lirepatsüka chiyungertem-to yimdong nung samar, temerem su abener yintetertem-to ruja nangden dak ontaka lir" (Aiatai-4:1-2). "O kibuba onok dak kechi ataloka lir aji bilemtetangma. Ajiang onok maksu nung lir, onok senmang bendanger onok den semloka alir nem agütsüogo" (Aiatai-5:1-5). T-8: Onok madak alartemi yimsu asur. T-11: Zion nung tetsürtem Yihuda nung aiurtem teka yia raksatsür. T-15 : Onok mulongjang nung tepela anenogo, onok tsüngsangba-to mangyim kümogo. T-16: Onok kolak nungi korang semzüksüogo. Ashiko, asen Aotsür Aor tulurtemi anir tilar tashi sorkar rongsen tim mesüi ketdangsua amshiba, mesüra asentzüsena meinyaki mela-mela bener aruba ochimashi rongsen agi chirnur mesua intetdaksüba agi iba angadi rongsenji chireptsü atema item atakatem ya atalok asu ta shisadanger.

(Maneni asü ng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Korea Arogoi Vietnam War mapang aibelenba atema tatok meshi



February 05, 2023 nü Vietnam kübok Lang Son nung aliba St. Dominic Tenla kidang South Korea nungi tongti putir, Peter Lee Ki-Heon (tejaklen abelen nungi tasembuba) leniba nung Korea nungi putirtem aser Vietnam nung putirtem külemi tangokba noksa nung angur.

February 09, 2023: South Korea nung tongti putir kati, US leniba nung Vietnam War mapang Korea nungner sepaitemi ozüing alema aibelen balala inyakba atema Korea Arogo tenüing nung Vietnam nungertem dang tatok meshiogo, ta osang ka ajanga metetdaksü.

Korea kübok Uijeongbu nung tongti putir, Peter Lee Ki-Heon leniba nung putir 12-i anogo ishika tejaklen Vietnam nung Lang Son Cao Bang Arogo semdanga liasü.

1999-2010 nung Military Ordinariate lenir aser tang tongti putir, Peter Lee-i, "South Korea nung Catholic Arogo tenüing nung ni Vietnam nung aliba Arogo dang tatok meshir," ta ashi.

Küm 40-50 tejaklen Vietnam nung Korea nungner sepaitemi rara mapang Vietnam nungner anema inyakba atema tang mezüing Korea nungner putir kati Vietnam nungertem dang tatok meshir.

February 5, 2023 nü Lang Son nung Vietnam nungner putirtemi Korea Arogo nungi Peter Lee den pa meina aoyer putirtem agizüka liasü.

Kasa anogo nung St. Dominic Cathedral nung Korea aser Vietnam nungner putirtem den külemi yangji aliba Arogo züngsemtem longjemer tekülem sentong ka agia liasü.

Arrshi küm 76, Peter Lee ya Korean People of the Catholic Bishops' Conference indang Special Episcopal Commission for Reconciliation nunga chairman lir.

1964 aser 1973 nung South Korea nungner sepa 350,000-i US sepaitem den senteper Vietnam rara nung shilem agia liasü.

February 7, 2023 nü Seoul Central District Court-i South Korea sorkar dang Vietnam rara mapang nung lendong nung jenbur Vietnam tsür, Nguyen Thi Thanh nem senotsü temenok

agüjang, ta tuyua liasü. 1968 küm Quang Nam province nung South Korea nungner sepaitemi civilian 74 tepsetba mapang nung labo (Nguyen Thi Thanh) tasü nungi jenbua liasü. Iba mapang nungji la arrshi küm 8 dang liasü saka tangbo la arrshi küm 63 lir.

Vietnam War mapang nung lar kinüngertem aika asüba aser yiruba atema 2020 küm lai South Korea sorkar anema ken o benoka liasü.

Vietnam semdangba mapang nung putir Peter Lee leniba nung putirtemi Phat Diem Cathedral semdangba den külemi Ninh Binh province nung 1875 nungi 1898 tsüingda yangluba Tenla ki pongu semdangogo.

Parnokisa Ha Nam province nung Vietnam nungner

taküm bendanga agüja asür sepaitem nüngtem nung yangluba So Kien Minor Basilica semdang aser Lang Son Cao Bang nung tamalen inyaker asür putirtem leper semdang.

Peter Lee-i, Korea aser Vietnam na ya Khrista atema taküm bendanga agüja asür Khristantem linük lir, ta metetdaksü.

Peter Lee-isa South Korea-i arua aayanger Vietnam nungertemi par Arogo nung adenba atema pelaba lemsatepa liasü.

Vietnam nungner putir aser South Korea nung aliba Uijeongbu Arogo nung pastoral care in charge, Joseph Nguyen Van Doan-i asalentong yanglua South Korea nungi putirtemi Vietnam semdang.

2022 küm Khristan putir aser nun 100 dak tema reshikangshi

February 09, 2023: 2022 küm alima tesem balala nung Khristan putir aser nuns 100 dak tema reshikangshiogo; parnok kar puer ao, kar tepuokdak ayu mesüra karbo tepsetogo, ta papal foundation ka ajanga metetdaksü.

"Alima nung Arogo tenzüksü atema linük tamajungtibatem rongnung Nigeria ya temaba jenjang nung lir; yaküm iba linük nung putir pezü tepset," ta South Korea nung aliba Catholic Peace Broadcasting Corporation (CPBC)-i metetdaksü.

Aid to the Church in Need (ACN) report nung ajemdaker CPBC-i iba osang ya renema liasü.

Nigeria sülen tanabuba linükji Mexico lir; yaküm Mexico nung temesepba mozü shibelenertemi putir asem tepset aser Democratic Republic of Congo (DRC) nunga putir ana tepset.

ACN-i linük ajak dang peipei linük nung Tsüingrem tenzüker putirtem, missionary

tem aser Arogo lenirtem anema meinyaksü mepishiogo.

"ACN-i linük ajak dang teyari nüngdakba tesemtem nung nübur tenzüker putirtem, sisters aser pastoral agent tem meyrutsütsü mepishir," ta report nung shia lir.

1947 küm tentetba melungtet telok ACN-i alima tesem balala nung teyari nüngdakba Khristantem nungita yarir aser charity mapa balala inyaker.

Kasa report ajanga, 2022 küm China linük nung ketdangsertemi Khristan putir kwi apuar mejangjar, ta metetdaksü.

ACN-i, "China nung ketdangsertemi underground Church nung putirtem apur aser linüki agizükba Arogo organization nung register asütsü tuyur," ta metetdaksü.

Kasa report ajanga yaküm January nungi May ita tashi nung China kübok Baoding (Hebei) nung underground Arogo nungi putir 10 samaba osang metetdaksü.

ANO GO ABEN TSÜNGREM DEN

Temeimi Tashi Angaba Bener Arur

"Shiba den kü ozüing lir, aser aji benshir, pai ni meimer: aser shibai ni meimer Kübui pa meimtsü, aser ni pa meimtsü, aser ni kü sasa pa dang jungkai adoka sayutsü" - Yn. 14:21

Tsüingremer ozüing dang tashi angabaji ne mulungjang nungi adoker. Kodang Tsüingrem dang tashi angatsü ne mulungjang atsütepedir, iba jagi ne mulungjang Pa nungi pilaogo ta sayur. Kari ashir, "Ni Tsüingrem meimer, saka kü taküm nung mapa kar nung Pa dang tashi angatsü timtem adoker." Aji tanelaren tamakoktsü. Kari ne dang asüingdangra, "Nai

Tsüingrem meimer asü?" nai mela mela dang langzütsü, "Au!" Aji saka, ne dang, "Nai Tsüingrem dang tashi angar asü?" ta asüingdangra, nai yakta dang au ta langzütsü asü? Chichiba Tsüingrem meimba jagi temulungjang ajunga agi Tsüingrem meimba dangi anir. Nai nübuttsü dang mapang kar nung meimer, saka mapang kar nung na meimtsü nungnanger ta shira nena tesendaktepji lendong nung alitsü. Asenoki tesadang meimba nung Tsüingremi temulung asür ta asenoki bilemer. Pa yamajimasü.

Temeim medeni tashi angabaji ozüing yim lir. Pei asoshi tashi angabaji tetemjenyim lir, koba agi asüküm dangi anir. Khristan aikati Khrista dang tashi angatsü asoshi tazüokba nung alitsü meranger. Tanelaren tazüokba alitsü akok saka iba jagi kodanga nai Tsüingrem meimba melentsür makok. Tsüingremi na jakla merüka aliba, yimya, na liba liro junga aliba aser arogo mapa nung shilem agiba atena oa repranger aser ne mulungjang ateta angur.

Ne taküm tazüing aser yimya tentet ka dang akümer asü? Tsüingrem o azüingtsü tejangraba makai akümer asü? Na tanela nung azümasen akümer asü? Itemji ne temulungjang Tsüingrem nungi atsüingzuka aoba temaitsü tem lir. Na mezüing temeim dangi meyipang. Tsüingrem den tesendaktep alitsü aser tenzüksü asoshi temeimji tajungmesoba tulutiba lir.

Ano 2022 küm alima tesem puer ao saka Mali nung puer balala nung missionary mapa inyaker Khristan tetsür pongu tepsetba osang ACN-isa metetdaksü.

Yaküm June ita nung Haiti nung Sister Luisa Dell'Orto tepset, August ita nung South Sudan nung Sister ana- Mary Daniel Abut aser Regina Roba na tepset, September ita nung Mozambique nung Sister Mari de Coppi tepset aser October ita nung Congo nung Sister Marie-Sylvie Vakatsuraki tepset, ta ACN-i metetdaksü.

2022 küm linük balala nung Khristan putir 42 puer ao saka parnok 36 bo chiokogo.

2022 küm Nigeria nung putir 28 puer ao aser parnok rongnung putir asem tepset aser putir anabo kong aliar mejangjar.

Cameroon nunga putir trok puer ao aser parnok rongnung putir pongubo chiok.

Haiti nung telok balalai putir pongu apu saka tesülen chioka liasü. Ethiopia, Philippines aser Mali linüktem nunga putir kaka

puer ao saka Mali nung puer aoba putir Hans-Joachim Lohre bo tang tashi mechiok, ta kasa report ajanga metetdaksü.

Nigeria nung 2022 küm sisters tenet puer ao, Burkina Faso nung nun ka puer ao aser Cameroon nunga nun ka puer ao, ajisüaka parnok ajak chiokogo.

ACN report ajangasa, Russian-occupied Ukraine nung Ukrainian Greek Catholic Church nung inyaker putir pezü puer aoba osang metetdaksü. Putir anabo Ukraine litsüi tanaben meyipa yok saka anabo tang tashi mechioker.

Nicaragua nunga tongti putir, Rolando Álvarez densema Arogo lenir aser putir 11 puer ao. Parnok rongnung putir asem- Ramiro Tijerino, José Luis Díaz aser Sadiel Eugarríos; Deacon Raúl Antonio Vega; seminarian-Darvin Leiva aser Melkin Centeno na aser cameraman, Sergio Cárdenas nungner lir.

Parnok ajak ya Matagalpa Arogo nungi lir.

AO OSHI ANGAZÜKDAK:

TANÜ ANGAZÜKTSÜBA OJANG



Oshioben

(n) nisungtemi jembia aruba oshi (linguistics)

* Lanurtemi **oshioben** angazükba nung kanga temlung agütsür.

Oshioin

(n) oshi renlokdahtsüba (development of literature)

* Ao Sendeni **oshoiin** tsütsü kanga temlung agütsür.

OLONG PAITEP # 6424

1				2				3		4
5		6								
						7				
8										
										9
		10				11				
				12				13		
14										
						15				
16										

TIPIEN

- 2. Auo nung chiyongtsü asenba
- 5. Mangyimba mapang
- 7. O tamendakdak
- 8. Pei dak malangba
- 10. Juli
- 12. Sen ayudak
- 14. Tenük agi ajilet
- 15. Tamajung aküm
- 16. Apuso

LANGTSÜNGLEN

- 1. Lenmang
- 2. Aor kidong ka tenüing
- 3. Tenarong maten
- 4. A _ _ _ g
- 6. Mopung apodoka
- 9. Tongtipang tagitsü
- 10. Menungra bilem
- 11. Aiür
- 13. S _ _ _ k
- 14. T _ _ _ r

OLONG PAITEP # 6423 TELANGZÜBA

TIPIEN :

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem,
- 15. Tambu, 16. Khuret,
- 17. Sang.

LANGTSÜNGLEN :

- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok,
- 12. Amang, 14. Jala.



ALOKBA O WARAKLA NA KIBONG NUNG :

Alokba aonungshi office temer medemer kidangsür carrom akaisa ao. Konungbo pa temang majungar ta sür tantsü tena paper zünga kazü dangji phone ka arudangji Warakla tera petsaperonga alidang, "Ni tanabaji ni agizükdi" ta Shir phone ji agizüka jembir.

Alokba : Hello, hello- haet ni ya tsüngsang mopung incharge mahato, saala.

Warakla : Tambu shibai kechiata aharba aji?

Alokba : Aeee, howar kati anüing merüka lir mali aharba ati, mato.

Lilir : WhatsApp



Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüing :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

Tripura assembly election atema BJP-i party manifesto sayaogo



February 09, 2023 nü Agartala nung BJP National Tir, JP Nadda den party lenirtemi Tripura assembly election atema party manifesto sayadang tangokba noksa nung angur.

Agartala, February 09 (Agencies): Brihostibarnü BJP-i Tripura assembly election atema party election manifesto sayaogo; manifesto nung Tripura nung tribal council nem tashi tulu agütsütsü aser aluyimertem den tetsürtem nem tajangzük balala agütsütsü nangzüka lir. Agartala nung BJP National Tir, JP Nadda-i osangbenertem senden nung masü saka party züngsemtem matsüngdang ang party manifesto saya.

BJP election manifesto nung state nüburtem nem mapa agütsütsü, pension mesüra dearness relief agütsütsü kecha nangzüka mali.

Tripura assembly election nung tongti party asem tsüngda tokteptsü.

State nung party tasen- Tipra Motha party-i greater Tipraland nangzüka lir, aser iba dak sendakba nung BJP-ia tribal council nem tashi tulu agütsütsü nangzüker, ta yimtenren mongintemi bilemer.

Tripura nung TMC-ia aluyimertem aser tetsürtem nem tajangzük balala agütsütsü nangzüka lir.

Assembly menden 60 aliba Tripura state nung February 16 nü election agitsü aser iba election nung BJP, Tipra Motha aser Congress-CPI(M) tsüngda tokteptsü.

BJP manifesto sayaba sülen osangbenertem den jembidang BJP National Tir JP Nadda-i,

"Onoki Tripura ya DTH lenmang nung anitsü; DTH tetezü- development, transformation aser harmony lir," ta metetdaksü.

BJP-isa nisung ajak nem sen 5-i chiyungtsü anguba scheme agütsütsü aser Agartala nung Regional Institute of Medical Sciences hospital amenoktsütsü, ta nangzüker.

Party manifesto nungsa, Balika Samridhi bond kübok tetsür chanu nem sen 50,000 agütsütsü aser tribal oshi Kokborok ya CBSE aser ICSE nung züngoktsü, ta nangzüka lir.

Nadda-i, BJP-i Tripura Tribal Areas Autonomous District Council (TTAADC) nem legislative, executive aser financial tashi tali agütsütsü, ta nangzüker.

"Tribal areas nem onoki tashi tulu agütsütsü; item rongnung legislative, executive aser financial tashi densema lir," ta pai metetdaksü.

Senior IGP level officer tem Council areas nung lemzüksütsü aser parnoki Council Chief Executive Member den amalitepa ozüing benokba nung yariteptsü, ta pai metetdaksü.

Tribal sobaliba research agitsü, sobaliba ajungkettsütsü aser itemji wazükja ayutsü atema Dhalai district kübok Gandacherra nung Maharaja Bir Bikram Manikya Tribal University amenoktsütsü, ta pai metetdaksü.

February 5 nü Tipra Motha party-i manifesto sayaa liasü aser manifesto ajanga parnoki 'Greater Tipraland' atema raratsü nangzüka lir.

State nung Opposition CPI(M)-i aniba Left Front-ia mapa tasen lakh 2.5 adokdaksütsü, sensaker teintet sensotem nem pension agütsütsü, old pension scheme agütsütsü aser sorkar mapa inyakerem nem küm shia DA anaben agütsütsü nangzüka lir.

Ajisüaka BJP manifesto nungbo mapa agütsütsü mesüra sorkar mapa inyaker aser pensioners 1,88,494 nem DA agütsütsü menangzük.

2018 küm Tripura assembly election nung BJP-i takok ngua liasü; iba election nungji BJP-i küm 5 tsüngda mapa lakh 2.5 agütsütsü nangzüka liasü saka nangzükbaji dang liasü.

Mapa magütsüba dak sendakba nung tasüngdangba ka langzüdang BJP manifesto committee chairman, Dr Ashoke Sinha-i, "Tawa onoki mapa inyakerem atema DA tutsüogo aser mapa mangurtem nema mapa agütsüogo. Onoki iba onük atema bilemer, ajisiüaka tiyazü nung menangzükner," ta metetdaksü.

Nadda-i, "Onoki rubber, Agar aser aou atema industry-specific manufacturing zones amenoktsü aser ibaji ajanga mapa aika adokdaksütsü," ta metetdaksü.

**GOVERNMENT OF NAGALAND
DIRECTORATE OF TECHNICAL EDUCATION
NAGALAND:KOHIMA**

NO. DTE/ ESTT-2/02/2021-22/

/Dt. Kohima, the Feb. 2023.

NOTIFICATION

As notified by the University Grants Commission (UGC), the Common University Entrance Test (CUET) has been introduced for admission into UG/PG programs in Central Universities and other participating Universities. In this regard, this is to inform all concerned that the Department will not conduct Nagaland State Entrance Exam (NSEE) from the current academic session onwards and that the selection of Candidates to fill up the State Reserved Seats in Agriculture & Allied Courses and Paramedical Courses will be based on the score of the Common University Entrance Test (CUET)-UG 2023, conducted by National Testing Agency (NTA) for admission to Undergraduate programs in all UGC funded Central Universities in India. Therefore, candidates desirous of pursuing undergraduate courses through State quota are informed to sit for CUET UG-2023. The merit of the candidates will be prepared using the combined score of Physics, chemistry and Biology for the selection and nomination of Candidates.

The application process for CUET UG-2023 is likely to be started in the month of February 2023 and the examination will be conducted between the 21st and 31st May 2023.

The prescribed application form for submission of CUET UG-2023 score card and choice filling will be announced in due course of time.

(Er. M. Nakro)
Director.



Brazil indang environmental agency, IBAMA ajanga agütsüba noksa ka nung Yanomami Indigenous territory, Roraima state, Brazil nung miner indang tayimtsü ka nung mi janrua aliba agent kati repranga aliba angur. Yanomami Indigenous territory nung ozüng alema hon ator meyirijang aika lir aser parnoki yangji aliba ayong tem menenja ayawara aser tashidak bener arutsüba mechi Brazil ketdangsür temi iba tesem tanaben agitsü operation tenzükogo.

Turkey-Syria menoknok nung asür 17,500 jungogo

Ankara, Tsüklai/February 09 (Agencies): Turkey aser Syria nung menoknok tesashi anoker anogo pezü jungogo aser temperature kanga mokongba ajanga takum kumzüka alirtem nem timtem tali agütsür aser tekumzükter temi tang tashi ki-o-jen laoa alidak zünger-mezüingma nisung nembanga aliba kumzüktsü arsanga inyaker.

Hombarnü menoknok magnitude 7.8 anokba nung asür nisung 17,500 jungogo aser rer laa mokonga alidak nisung takum ngutettsü teimla samaa aor. Menoknok anoker tetenzüklen yaritepba nung sorkar tsütsü metok-meperi liasü, ta Turkey Tir Erdogan-i Bodhbarnü nangzük.

Hombarnü anokba menoknok lendong ajanga Turkey nung nisung 14,351 süogo aser Syria nung nisung 3,162 süogo, ta ketdangsür aser medics temi ashir, anungji linük ana ya senteper iba lendong nung asür nisung 17,513 jungogo.

Iba lendong nung takum kumzüka alirtem chiyongtsü

asür jenokdak ki asoshi rakteper aser nisung kari repranga lia pei kinungertem jana telung nung asüba ajangshir.

Iba menoknok mechi nisung 298,000 dak tema pei ki yutsür aotsüsa akum, ta Syrian state media ajanga ashi, anungji ibai Syrian sorkar kübok aliba tesemtem nungi amai angateter.

UN aid chief Martin Griffiths-i hopta tatemlen Turkey nung Gaziantep semdangtsü aser Syria nung Aleppo aser Damascus semdanga nungdakba asadangtsü aser United Nations ajanga tajungtiba nung yaritsü lenmang bushitsü, ta UN Secretary-General Antonio Guterres-i ashi.

"Lenmangtem raksar lir, nüburtem tasür. Menoknok agi kongshir aliba tesemtem ajunga nung teyari oset aser teyariteper tongtsütsü asoshi akokba lenmangtem bushitsü mapangji tangya lir. Asenoki nübur mezüng südaktsütsüla," ta Guterres-i New York nung osangbener dang ashi.

Sorkar anemer kübok aliba north-west Syria nung UN

ajanga teyari agütsüba osettem bona aliba gari Turkey ajanga aruogo.

Mürekmejuba aser danga osettem bona aliba gari tulu trok Idlib nung Bab al-Hawa crossing ajangogo, ta ketdangsür temi ashi.

Nisung takum kumzüktsü asoshi nungdakba osettem bener meyoktetba atema yangji alirtemi temolung masüba lemsatapa lir.

"UN teyari ya menoknok manokdang nungi teti agüja arur. Ibai special aid ka masü, ibai search and rescue team tem atema masü, ki-o-jen laoba agi nembanga alirtem asoshi masü," ta White Helmets ajanga ashi.

Hombarnep menoknok yagi nisung 1,930 takum samatsüogo, ta White Helmets ajanga ashir, shirnok Syria nung sorkar anemba telok kübok aliba tesemtem nung yaritepba tentet ka lir.

Ki 418 okshia raksatsür aser 1,300 dak tema tera raksatsür alidak nungi temai madokteti kibong aika lir, anungji asürtem tali akumtsü, ta parnoki tekumdangtsü ashi.

Zelensky-i EU lenirtem dang fighter jets meshi

Brussels, Tsüklai/February 09 (Agencies): Rara tenzükter tanaben linük yutsür aoba mapang Ukraine Tir Volodymyr Zelensky-i European Union lenirtem dang Russia den raratsü atema fighter jets aser nok-nü agüjang ya ayongzüka liasü.

"Asenok amalitep yimya ulushitsüla, Asen anema tashiyim amshir dang asenoki tekeraba inyaktüla," ta pai ashi.

Brussels nung aliba European Parliament nung pai iba o jembidang teloki nokdaker pela teka malokja agizüka liasü.

EU lenir aikati lungjemer warplanes agütsütsü asoshi telemtetba agitsü nungdaker, ta shiogo.

Kari yimjak nung iba o mejembiner aser kari Russia den rara tuluba mekumdaktsüner.

Iba rara nung indang-indanga

mesüra tezülen nungi anüolen linük shilem agitsü 'line' samaa aor, ta Kremlin-i Brestostibarnü tekumdangtsü ashi.

Zelensky indang presidential staff tekolakba Andriy Yermak-i long-range nok-nü aser fighter jets ken o angatetepogo, ta ashir saka Zelensky-ibo tezüngzükteper tajung kar yanglu saka yimjak nung masü, ta ashir.

Tarutsü nung jets agütsütsü atema telemtetba agia mali saka Ukraine nung pilot nem tang par ket nung aliba tayimtsü asoshi training agütsütsü, ta UK-i ashi.

Poland Ato Kilonser Mateusz Morawiecki-i NATO telemtetba kübok par linüki inyaktü, ta ashi aser Dutch Ato Kilonser Mark Rutte-i iba ken o shinga nema memetdaksüi jembio, ta ashi.

European Parliament

President Roberta Metsola-i EU linüktem dang Kyiv-i jets meshiba tekeratiba nung telemtetba agitsüla, ta ayongzüka liasü.

Brussels nung aliba Parliament nung jembidang Zelensky-i Ukraine ya European nung ama athishia ashi.

Ukraine-i EU nung adentsü asüngdanga lir saka iba telemtetba küm aika nung ang agir.

Turkey south tsütsü Antakya nung mosque ka raksar alidak nisung ka nokdaka aliba noksa nung angur.

Hombarnep menoknok anokba lendong nung takum alirtem ngutettsü teimla sama aor saka Turkey aser Syria nung ki meyirijang aika laodaktsür alidak maneni ketdangsür temi nisung bushir.

TARGET NPSC 2023

NEXT BATCH AFTER ELECTION - 6TH MARCH

PRELIMS
PREPARATION

MAINS
PREPARATION

INTERVIEW
PREPARATION

WITH
NSSB

QUALITY TEACHING

QUALITY MATERIALS

QUALITY TEST SERIES

QUALITY PREPARATION

RS. 45,000/- ONLY JOIN TODAY

TARGET UPSC 2024

GS FOUNDATION | OPTIONAL PSIR | HISTORY

YES, YOU CAN BECOME THE NEXT

IAS

YES, YOU CAN BECOME THE NEXT

NCS

GIRLS PG IN CAMPUS

BOYS PG IN CAMPUS

CALL NOW @7005114715
ADMISSION OPEN

EduVersity

NPSC PREPARATION 2.0


SANGDONGER

Tang aruya aliba election nung 27 A/C nungi NPF Party candidate arua mali nungji teküboklen agüja aliba nisungtemi NDPP candidate Shri. Metsübo Jamir tashi ajak agi nungita yaritsü lemtetba sangdonger.

1. Sangjipang - President 27 AK Hkg. - *[Signature]*
2. Napushi. Pongen - G/Secretary 27 AK Hkg. *[Signature]*
3. Tensihaba - v/p. 27 AK Hkg. *[Signature]*
4. Sashiwali - v/p. Hkg Division. *[Signature]*
5. Bendangzuba - G/S. Hkg Division. *[Signature]*
6. Alichang - G/S Y/W Hkg Division. *[Signature]*
7. Kamangshi - President Aongga unit *[Signature]*
8. Kamyangar - G/S Aongga unit. *[Signature]*
9. Yimyangguba - v/p 27/AK Y/W Hkg. *[Signature]*
10. Yimkummen - v/p Y/W *[Signature]*
11. Limakumzuk - Member. *[Signature]*
12. Imjungmeren - Member. *[Signature]*
13. Chupjungmeren - Member. *[Signature]*



Lionel Messi indang contract atsülangba mepelar



Paris, Tsüklai/February 09 (Agencies): Lionel Messi-i mezüingbuba Coupe de France takok marok angutsü teimla yasüing Paris Saint-Germain (PSG) tsükba sülen samaogo. Bodhbar aonung Olympique de Marseille den asayadang gaol 2-1 agi makokba sülen Messi tejak nung tezü atangba ajitet.

PSG mejungi asayaba ajanga social media nung pusemer temi Argentina nung striker Messi-i junga masayatetba indang zülua liasü. Taoba mapang France nung Jerome Rothen-ia round of 16 asaya nung Messi-i junga masayaba indang shia liasü. RMC Sports

den The Mirror ajanga sensaksemdang taoba mapang PSG nungi asayasang Rothen-i Messi den contract tasen agütsüba ya sentong tai, ta shia liasü.

"Messi ano sa saidaktsütsü ji tamashi mapa, kechiaser PSG club-ji 'financial fair play' nung tsükdaka lir. Messi itasen agi asayar tajung tasen aika anioxtsü lenmang lir koba ajanga telok tajungba yanglutetsü. Anungji Messi nem ano contract tasen agütsübaaji asalentong tajung masü," ta Jerome Rothen-i ashi.

Rothen ya taoba mapang PSG nung asayar tongtipang ka

liasü aser pai PSG asoshi asaya 180 nung shilem agia goal 13 yokba dang masü saka assists 41 tashi ngua lir.

Kasa mapang Lionel Messi ya alima nung football asayar rongnung tajungtiba ka ama asaya aruba nübo ka lir. Pai Argentina linük asoshi asayaba mapang Copa America, FIFA World Cup aser Finallissima takok marok tem ajangteta lir. Saka Ligue 1 asaya nung pa dak temolung machir aika lir. Taküm asaya mongpu nung pa indang contract atemtsü saka club kibur temi pa nübo ayutsü kanga janjar.

France nung Kylian Mbappe maliba ajanga PSG ya Coupe de France asaya nung tashi maitba telok ka ama liasü. World Cup takok ngua asayar Mbappe ya yirur asaya nung shilem magiteti lir.

Lionel Messi akhi ama masayateter ta jembiaka pai PSG asoshi tang mongpu nung 25 match asayaba nung goal 12 agütsüba dang masü saka assists 14 tashi ngua lir. Ballon d'Or marok 7 ben tashi angusang Messi ya pa tanur asüadang asaya aruba club, Barcelona yutsür tesüiba küm 2021 nung PSG nung arua aden.

Qatari investor temi Manchester United alitsü meranger

London, Tsüklai/February 08 (Agencies): Premier League club Manchester United alitsü atema Qatari investor temi sen jenti indoktsü sentong lir, ta Daily Mail osangkaket ajanga Mongulbarnü ashi.

Item investor ya Qatar nungi taka-taiter jurila telok ka, ta ashir kong 2022 World Cup asaya liasü.

US nungi iba club kibur Glazer kibong ajanga investment tasen mesüra ayoktsü asoshi lenmang bushir ta November ita ashiba sülen Jim Ratcliffe indang company INEOS ajanga United alitsü taoba ita nungi maparen tenzüka liasü.

Taoba ita Bloomberg News ajanga, Paris St Germain kibur Qatar Sports Investments (QSI) yagi Manchester United mesüra Liverpool ajanga mesüra shilem ka alitsü asadanger, ta shia liasü.

United fans temi kibur tasen melentsü ola adoka arur aser Glazers dak tenük yoker tenüing asener, kechiaser iba telok yagi 2017 nung Europa League aser League Club trophy tem akokba dak alaka takok tajung monguteti arur.

April ita nisung meyrirjang aika Old Trafford kima adenshia longkak ait aser Glazers 'club nungi ainshiang' ta ken tena liasü.

Ano fans tem rongnung tang tashi mangatetep adoka jembiba onük kaji United indang sentsüh ya lir, koba September tashinung sen million pounds 515 (million \$620.42) liasü.

Iba team ya Erik ten Hag-i ketdang asür aser Premier League nung asaya 21 sülen points 42 bener Manchester City sülen jenjang asemubaba nung lir saka tematiba nung aliba Arsenal dang points ti agi tajemba nung lir.

Newcastle-i Everton forward Gordon alizüktsü mulunga agizükogo



Anthony Gordon

Tsüklai/February 09, 2023 (Agencies): Newcastle United-i sen pound million 45 yong Everton nungi asayar Anthony Gordon alizüktsü mulunga agizükba sülen pa den tenangzüktepba ka yanglutsü ana nung lir.

Pa alizükba taaji sen pound million 40 asütsü aser iba sülen add-ons densema sen pound million 45 shi asütsü.

Midfielder Gordon ya summer nung Chelsea puria alizknüa liasü saka Everton-i pa atema sen pound million 60 meshiba ajanga malizükttet, ajisüaka tangbo parnoki pa ayoktsü atema telemtetba agiogo.

Frank Lampard melena manager tasenba Sean Dyche shimba sülen pa nema Gordon alizükba taa ya shilem ka agütsütsü imlar.

Gordon ya Everton nungi anitetba asayar ka lir. Pa 2020 küm nungi asaya tenzüka sülen tang tashi nung asaya 65 nung

goal tenet idakja lir.

Boxing Day nung Wolves pur kidang makokba sülen pa tang tashi nung asaya ka nunga danga tetenzük nungi asaya mali aser pai tatemsa October 22 nü Crystal Palace goal 3-0 agi akokba asaya nung goal ka idaktsür lir, koba Everton pur atema tatembangbuba takok liasü.

Kasa mapang nung defender Kieran Trippier den tenangzüktepba tasen ka yangluba indang Newcastle-i sangdongogo.

England nung full-back ya 2021 küm January ita sen pound million 12 yong Atletico Madrid nungi Newcastle nung arua adenba mapang 2023-24 season tatem tashi asayatsü atema tenangzüktepba ka yanglua liasü.

Tenangzüktepba tasen yanglushiba sülen arishi küm 32 tain asayar ya Newcastle United nungi 2025 küm tashi asayatsü.

Ukraine-i 2024 Olympics nung shilem magitsü amokmerenba agientsüla: IOC

Tsüklai/February 09, 2023 (Agencies): Paris nung akatsü aliba 2024 Olympics nung Russia aser Belarus nungi saisaponger temi shilem agira Ukraine-i shilem magitsü amokmerenba agientsüla, ta International Olympic Committee-i ajungshia liasü.

IOC tir Thomas Bach-i Ukraine indang Olympic Committee dang iba ama amokmeren ya kangasa tesasatsüka lir, ta ashi.

Iba telanzüba nung Athletes for Ukraine-i IOC ya puti otsü tai len lir, ta aitsü.

Russia-i amakba mechi Ukraine-i linük balala nungi linük ana indang asayartem shilem magidaktsütsü tenokdangba agütsüdaktsüner.

Russia aser Belarusian athlets tem neutrals ama

tokteptsü atema lenmang bushitsü, ta IOC-i shia lir.

Ukraine indang sports minister Vadym Guttsait shiba Olympic Committee tir lir, paia Paris Games nung par linük shilem magitsü akok, ta shia liasü.

2024 Olympics nung Russian athletes tem shilem agidaktsüba ajanga kiralongrar ya terabo agizükter ama sayutsü, ta Ukraine Tir Volodymyr Zelenskyy-i ashi.

Shilem magitsü amokmerenba ya teintet makumba yimya ka lir, kechiaser IOC ajanga Russia aser Belarus nungi saisaponger tem neutral ama shilem agitsü indang tejangja jembia mali, ta Bach-i ashi.

Olympic movement ajungai Ukraine nung

saisapongertem busemer aser iba rara nung Ukraine nung timtemba onoki angateter, ta Bach-i ashi.

2022 küm February ita Russia-i Ukraine amakba sülen IOC-i sports federation tem dang Russia aser Belarus nungi saisapongertem, ketdangsurtem aser team tem international asaya nung shilem magidaktsütsü ayongzükba liasü, ajisüaka iba ama tenokdangba yagi saisaponger timtem balala ajuruba bilemstür, ta paisa ashi.

Ita tetenzüklen Latvia, Lithuania, Estonia, Poland, Denmark, Finland, Iceland, Norway aser Sweden indang Olympic committee temia Russia aser Belarus nungi saisapongertem anema ola adoka liasü.



Nagpur nung aliba Vidharba Cricket Association Stadium nung India aser Australia tsüngta Border-Gavaskar test cricket asaya mezüingbuba tenzüksü lia Australia nung asayartem tangokba noksa nung angur. Iba saya nung Australia nungeri runs 177 yangluteta lia ajak out asü aser India nungeri runs 77 yangluteter nisung ka out süa lir.

BILEMDANGANG

"Medemeri pelaa aliba mapang masü, timtem mapang nung temeim sayur."